

**Consorzi da scola
Sumvitg-Trun**

Statuts

C u n t e g n

I.	Determinaziuns generalas	4
Art. 1	Num e sedia	4
Art. 2	Finamira	4
Art. 3	Lungatg	4
Art. 4	Egualitad dallas schlatteinas	4
Art. 5	Fundaziun	4
II.	Organisaziun	4
Art. 6	Organs dil consorzi	4
Art. 7	Elegibladad, motivs d'exclusiun ed incumpatibilitad	4
A.	Las vischnauncas dil consorzi	5
Art. 8	Obligaziuns e cumpetenzas	5
Art. 9	Votaziuns	5
Art. 10	Iniziativa	5
B.	Il cussegl da scola	6
Art. 11	Cumposiziun	6
Art. 12	Duers e cumpetenzas	6
Art. 13	Organisaziun	6
Art. 14	Sedutas	6
Art. 15	Conclus	7
Art. 16	Votaziuns ed elecziuns	7
Art. 17	Reglamentaziun da suttascripziun	7
C.	La cumissiun da quen e gestiun	7
Art. 18	Cumposiziun e pensum	7
III.	Persunal	7
Art. 19	Principi	7
Art. 20	Menader da scola	7
Art. 21	Persunas d'instrucziun	8
IV.	Casas da scola	8
Art. 22	Loghens d'instrucziun	8
Art. 23	Stanzas da scola	8
Art. 24	Dissoluziun d'in liug d'instrucziun	8
V.	Finanzas	8
Art. 25	Expensas	8
Art. 26	Entradas	9
Art. 27	Repartiziun dils cuosts	9
Art. 28	Cumpetenzas finanzialas	9
Art. 29	Onn da gestiun	9
Art. 30	Proprietad	9
Art. 31	Responsabladad per obligaziuns	9

VI.	Disposiziuns transitorias e disposiziuns finalas	9
Art. 32	Entrada en vigur	9
Art. 33	Surprida da mobílias ed indrezs	10
Art. 34	Revisiun dilz statuts	10
Art. 35	Extrada / dissoluziun	10
Art. 36	Abrogaziun	10
Art. 37	Approbaziun	10

I. Determinaziuns generalas

Art. 1 Num e sedia

¹ Cun il num "ConSORZI da scola Sumvitg-Trun", suadont numnaus consorzi, exista ina corporaziun da vischnauncas el senn d'ina corporaziun dil dretg public cun atgna personalitad el senn d'art. 50 lit. 1. b) ed art. 51ss. dalla lescha da vischnauncas dil cantun Grischun.

² Il consorzi ha sia sedia ella vischnaunca da domicil dil president.

Art. 2 Finamira

¹ Il consorzi meina sco purtader dalla corporaziun da vischnauncas la scoletta, la scola primara, la scola reala e secundara, sco era la classa pintga integrada el senn dalla corrispundenta legislaziun cantunala.

² En mintga vischnaunca vegn menau silmeins ina partiziun da scola.

Art. 3 Lungatg

Il lungatg d'instrucziun ei il romontsch sursilvan.

Art. 4 Egalitad dallas schlatteinas

Las indicaziuns davart personas, funcziuns e professiuns en quests statuts serefereschan sin omisduas schlatteinas.

Art. 5 Fundaziun

La fundaziun dil consorzi succeda cun l'approbaziun dils statuts entras las vischnauncas dil consorzi.

II. Organisaziun

Art. 6 Organs dil consorzi

Ils organs dil consorzi ein:

- a) las vischnauncas dil consorzi,
- b) il cussegl da scola,
- c) la cumissiun da quen e gestiun.

Art. 7 Elegibilitad, motivs d'exclusiun ed incumpatibilitad

¹ Sco commembers dil cussegl da scola san tuttas personas cun dretg da votar en ina dallas vischnauncas dil consorzi vegnir elegidas.

² Sco motivs d'exclusiun valan ils artechels corrispundents dallas constituziuns communalas conform al senn.

³ Ils commembers dil cussegl da scola astgan buca appartener el medem temps alla cumissiun da quen e gestiun. Plinavon astgan emploiats dil consorzi buca esser commembers dil cussegl da scola ni dalla cumissiun da quen e gestiun.

⁴ Commembers dil cussegl da scola ston prender stgisa tier tractativas e votaziuns davart fatschentas, nua ch'els ein cumpigliai sez ni in da lur parents e quina en lingia directa, consorts, fargliuns ni persunas cun las qualas els vivan en in partenadi ni cun ils quals els vivan en ina cuminonza factica, nua ch'in interess direct personal ei avon maun.

A. Las vischnauncas dil consorzi

Art. 8 Obligaziuns e cumpetenzas

¹ Las vischnauncas dil consorzi ein igl organ suprem dil consorzi ed han las suandontas obligaziuns e cumpetenzas:

- a) elecziun dil cussegl da scola,
- b) approvaziun e revisiun dils statuts,
- c) recepziun d'ulteriuras vischnauncas,
- d) approvaziun dil preventiv e dil quen annual,
- e) prender enconuschientscha dil rapport da revisiun,
- f) approvaziun dil uorden da scola,
- g) decisiun sur d'expensas ch'ei buca fixadas el preventiv ni talas che survargan la cumpetenza finanziaria dil cussegl da scola,
- h) dissoluziun dil consorzi.

² Ils conclus succedan tenor las duas constituziuns communalas e ston vegnir approvai dad omisduas vischnauncas.

³ Las vischnauncas dil consorzi han tut las cumpetenzas ch'ei buca surdadas explicit ad in auter organ dil consorzi.

Art. 9 Votaziuns

¹ Las votaziuns succedan en mintga vischnaunca e quei tenor il dretg communal. Il cussegl da scola fixescha tenor prioritad dalla fatschenta in temps da 6 meins, enteifer il qual las votaziuns en las vischnauncas han da succeder.

² Las vischnauncas prendan las necessarias mesiras per las votaziuns e communiceschon ils resultats da quellas en fuorma d'in protocol al cussegl da scola enteifer in'jamna suenter la votaziun.

Art. 10 Iniziativa

¹ Enteifer il consorzi han las duas suprastonzas communalas il dretg d'iniziativa.

² Ils votants dallas vischnauncas dil consorzi exerciteschan il dretg d'iniziativa tenor lur dretgs communalas.

³ 100 votants dallas duas vischnauncas dil consorzi san inoltrar da cuminonza ina iniziativa.

⁴ Iniziativas san succeder en fuorma d'ina proposta generala ni d'in sboz formulau. Ellas ein da motivar.

⁵ Iniziativas ein d'inoltrar al cussegl da scola.

B. Il cussegl da scola

Art. 11 Cumposiziun

¹ Il cussegl da scola secumpona dil president e da 5 ulteriurs commembers.

² Il commember da suprastanza incumbensaus cul scolaesser ei ex. officio commember dil cussegl da scola. Mintga vischnaunca elegia ultra da quei 2 ulteriurs commembers el cussegl da scola.

³ Il cussegl da scola seconstituescha sesez.

⁴ Il temps d'uffeci cuoza 3 onns.

Art. 12 Duers e cumpetenzas

¹ Il cussegl da scola diregia e survigilescha il menaschi dallas scolettas e dallas scolas communalas en applicaziun dallas prescripziuns federalas, cantunalas e communalas.

² Plinavon cumpetan ad el:

- a) fixar la strategia dil consorzi,
- b) representar il consorzi anoviars,
- c) elecziun e relaschada dil menader da scola; stipulaziun dil carnet da duers dil menader da scola,
- d) decisiun davart fatschentas, las qualas vegnan presentadas dil menader da scola, specialmein:
 - elecziun e relaschada da mussadras da scoletta,
 - elecziun e relaschada dils scolasts,
 - elecziun e relaschada digl ulteriur persunal,
 - fixar il pensum dallas persunas d'instrucziun,
 - organisar ils transports da scola sco era purschidas supplementaras (meisa da miezdi, tgira dil di),
- e) relaschar in uorden da scola per mauns dallas vischnauncas dil consorzi,
- f) relaschar in uorden da cumpetenza,
- g) relaschar in uorden disciplinar ed ulteriurs reglaments,
- h) survigilar ed haver quitau dils stabiliments e dil mobiliar,
- i) approbaziun dil quen annual, dalla bilanza e dil rapport annual, sco era dil preventiv per mauns dallas vischnauncas dil consorzi,
- j) recepziun da scolars d'ordeifer, sco era fixar l'indemnisaziun per lur scolaziun.

Art. 13 Organisaziun

Il president dil cussegl da scola envida allas sedutas e tgamunescha quellas. Dallas sedutas dil cussegl da scola vegn menau in protocol. Il protocol vegn mintgamai approbaus tier la proxima seduta.

Art. 14 Sedutas

¹ Il cussegl da scola vegn convocaus dil president dil cussegl aschi savens sco las fatschentas pretendan, denton silmeins 6 gadas per onn.

² Sin giavisch da 2 cussegliers ei il president obligaus da convocar ina seduta extraordinaria.

³ L'invitaziun alla seduta succeda en scret, per regla 7 dis avon il termin, cun indicar las tractandas.

⁴ Il menader da scola pren per regla part dallas sedutas dil cussegl da scola cun vusch consultativa. Resalvadas ein las disposiziuns davart la recusaziun tenor art. 7 al. 4.

Art. 15 Conclus

Il cussegl da scola ei cumpetents da decider sche pli che la mesadad dils cussegliers ein presents. Mintga commember dil cussegl da scola ei obligaus da votar. Resalvadas ein las disposiziuns davart la recusaziun tenor art. 7 al. 4.

Art. 16 Votaziuns ed elecziuns

¹ Il cussegl da scola pren sias decisiuns cun maun pli.

² Per tut las decisiuns vala il pli absolut dils commembers presents. En cass da paritad dallas vuschs decida il president, tier elecziuns la sort.

Art. 17 Reglamentaziun da suttascripziun

La suttascripziun legalmein valeivla cumpeta al president dil cussegl collectiv cun in auter commember dil cussegl.

C. La cumissiun da quen e gestiun

Art. 18 Cumposiziun e pensum

¹ La cumissiun da quen e gestiun dil consorzi secumpona da 2 commembers. Las suprastonzas communalas dallas duas vischnauncas elegian mintgamai in commember. Il temps d'uffeci cuoza 3 onns.

² La cumissiun da quen e gestiun rapporta annualmein silla fin da november en scret, per mauns dallas vischnauncas dil consorzi, davart l'examinaziun dil quen e dalla gestiun e fa proposta davart l'approbaziun dil quen annual.

³ La cumissiun da quen e gestiun sa surdar la controlla aritmetica dil quen ad in biro da revisiun extern.

III. Persunal

Art. 19 Principi

¹ Il menader da scola, las personas d'instrucziun ed igl ulteriur persunal ein emploiats dil consorzi.

² Subsidiarmein valan las disposiziuns dil dretg cantunal da persunal.

Art. 20 Menader da scola

Il menader da scola meina operativamein il consorzi surtut els secturs da pedagogia e da pedagogia speciala, dil persunal, dall'organisaziun, dall'administraziun e dallas finanzas.

Art. 21 Persunas d'instrucziun

Las persunas d'instrucziun san surprender sin incarica dil menader da scola ulteriuras incumbensas sco:

- a) pensums, ils quals ein necessaris muort l'incumbensa d'instrucziun e da formaziun ni che sedattan ord il menaschi da scola,
- b) funcziuns specialas e pensums specials pil consorzi.

IV. Casas da scola

Art. 22 Loghens d'instrucziun

Il consorzi mantegn en omisduas vischnauncas silmeins in liug d'instrucziun.

Art. 23 Stanzas da scola

¹ Il consorzi utilisescha l'infrastructura existenta dallas vischnauncas dil consorzi.

² Las localitads da scola restan en proprietad dallas vischnauncas. Quellas vegnan surdadas al consorzi sin basa d'in contract d'affittaziun. Il tscheins d'affittaziun vegn quintaus per tut las localitads tenor la medema formula. Quella calculaziun fuorma ina part integrala dil contract d'affittaziun.

Art. 24 Dissoluziun d'in liug d'instrucziun

In liug d'instrucziun en ina dallas duas vischnauncas dil consorzi sa mo vegnir sligiaus si, sche la vischnaunca pertuccada ei cuntenza cun quella dissoluziun.

V. Finanzas

Art. 25 Expensas

Il consorzi finanziescha:

- a) la salarisaziun incl. cuosts socials, perfecziunaments e spesas,
- b) ils cuosts per l'affittaziun dalla necessaria infrastructura,
- c) ils indrezs, las mobillas, las apparatusas, ils mieds d'instrucziun, il material da diever ed ils cuosts per ulteriuras mesiras ch'ein necessarias per garantir il menaschi da scola,
- d) ils transports da scoletta e da scola,
- e) ils cuosts per la structura dil di (meisa da miezdi, survigilanza da lecziuns),
- f) 50 % dils cuosts dalla meisa da miezdi,
- g) l'indemnisaziun dils organs dil consorzi tenor reglament da salarisaziun,
- h) ils ulteriurs cuosts (segiradas, occasiuns da scola e.a.v.) tenor preventiv.

Art. 26 Entradas

Il consorti cuviera ses cuosts:

- a) entras contribuziuns dallas vischnauncas dil consorti,
- b) entras contribuziuns cantunalas sin basa dalla lescha cantunala da scola,
- c) entras la participaziun dils geniturs vid ils cuosts dalla structura dil di,
- d) entras contribuziuns da tierzas persunas. Quellas ein d'impunder el menaschi da scola tenor directivas dil cussegl da scola.

Art. 27 Repartiziun dils cuosts

Ils cuosts vegnan reparti annualmein suenter haver tratg giu las contribuziuns cantunalas ed ulteriuras contribuziuns en proporziun dils scolars sin las duas vischnauncas. La repartiziun succeda sin fundament dallas partiziuns (cuosts scoletta sin il diember dils affons da scoletta, cuosts dil scalem primar sin fundament dil diember dils scolars dil scalem primar e.a.v.).

Art. 28 Cumpetenzza finanziaria

¹ La gestiun operativa finanziaria sco era la cumpetenzza finanziaria el rom dil preventiv cumpeta al menader da scola.

² Il cussegl da scola sa decider en atgna cumpetenzza davart expensas extraordinarias ed urgentas, che ein buca previdas el preventiv, entochen annualmein frs. 10'000.--.

Art. 29 Onn da gestiun

Sco onn da gestiun vala igl onn da scola (1. da settember – 31 d'uost).

Art. 30 Proprietad

¹ Ella bilanza vegn schaffiu negina facultad.

² Mobiliias, apparatus e.a.v. tenor art. 25 lit. c s'audan al consorti. Ei vegn menau in inventari.

Art. 31 Responsabladad per obligaziuns

Las vischnauncas dil consorti ein responsablas per las obligaziuns dil consorti en rama da lur contribuziuns.

VI. Disposiziuns transitorias e disposiziuns finalas

Art. 32 Entrada en vigur

¹ Quests statuts passan en vigur suenter l'approbaziun entras las radunonzas communalas e cun l'approbaziun dalla regenza grischuna.

² Il cussegl da scola entscheiva sia lavur suenter l'elecziun entras igl organ cumpetent da mintga vischnaunca dil consorti.

³ Quels statuts ein d'applicar l'emprema ga cun l'entschatta digl onn da scola 2013/2014.

⁴ Entochen ils 31 d'ost 2013 meinan ils cussegls da scola da Sumvitg e Trun las scolas sco entochen dacheu.

Art. 33 Surprida da mobillas ed indrezs

Mobillas, mieds e material da scola sco era mieds auxiliars dallas vischnauncas dil consorti vegnan surpris entras il consorti senz'indemnisaziun. La surdada vegn reglada en ina cunvegna.

Art. 34 Revisiun dils statuts

¹ Ils statuts san da tut temps vegnir revedì totalmein ni parzialmein sin proposta dil cussegl da scola, d'ina dallas suprastanzas communalas dil consorti ni sin fundament d'ina iniziativa tenor art. 10 da quest statuts.

² Ina revisiun dils statuts ei pusseivla mo sche omisduas vischnauncas dil consorti acceptan tala. Scadina revisiun sto vegnir approvada dalla regenza grischuna.

Art. 35 Extrada / dissoluziun

¹ Las vischnauncas dil consorti san extrar dil consorti da scola il pli baul suenter quater onns commembradi. Ellas ston tener en in temps d'abdicaziun da dus onns sin la fin dil onn da scola.

² Tier ina dissoluziun dil consorti vegnan dabiens ed eventualas obligaziuns repartidas ulivamein sillas vischnauncas dil consorti.

Art. 36 Abrogaziun


Cun l'entschatta dil onn da scola 2013/2014 vegnan tuttas stipulaziuns en leschas, reglaments ed ordinaziuns dallas vischnauncas, che cunterdian a quella, abolidas.

Art. 37 Approbaziun

Quests statuts ein vegni approvai dalla radunonza communal da Sumvitg dils 10 da matg 2012 e dalla radunonza communal da Trun dils 23 da matg 2012.

Vischnaunca Sumvitg

Il president communal


Walter Deplazes




Igl actuar communal


Patrick Schaniel


Vischnaunca Trun

Il president communal


Donat May




Igl actuar communal


Plazi Declertins


Approbau dalla regenza dil cantun Grischun tenor conclus dils 13.6.2017.....
(protocol nr. 624).

En num dalla Regenza

La presidenta


Barbara Janom Steiner

Il cancelier


dr. Claudio Riesen

